

Broj: 01-26-7-021-1-I/11
Sarajevo, 19.1.2012. godine

Na osnovu člana 25. stav (1) tačka f) Zakona o konkurenciji („Službeni glasnik BiH“ br. 48/05, 76/07 i 80/09), a po Zahtjevu privrednog subjekta „ZARUBEŽNJEFTESTROJOMONTAŽ“, društva sa ograničenom odgovornošću, Kalančevskaja 11, Moskva 107078, Ruska Federacija, zastupanom po punomoćniku Nataši Majstorović, uposleniku privrednog subjekta „Deloitte“ d.o.o. Banja Luka, Braće Mažar i majke Marije 58 i 60, 78000 Banja Luka, Bosna i Hercegovina, zaprimljenog od strane Konkurencijskog vijeća dana 16. novembra 2011. godine pod brojem: 01-26-7-021-I/11, Konkurencijsko vijeće na 26. (dvadesetšestoj) sjednici održanoj dana 19. januara 2012. godine, donijelo je

MIŠLJENJE

Privredni subjekt „ZARUBEŽNJEFTESTROJOMONTAŽ“ društvo sa ograničenom odgovornošću Kalančevskaja 11, 107078 Moskva, Ruska Federacija, zastupan po punomoćniku Nataši Majstorović, uposleniku privrednog subjekta „Deloitte“ d.o.o. Banja Luka, Braće Mažar i majke Marije 58 i 60, 78000 Banja Luka, Bosna i Hercegovina (u daljem tekstu: Podnosilac zahtjeva ili ZNSM Moskva), podnio je Konkurencijskom vijeću Zahtjev za davanje stručnog mišljenja (u daljem tekstu: Zahtjev), zaprimljen dana 16. novembra 2011. godine pod brojem: 01-26-7-021-I/11, u vezi postojanja koncentracije u smislu člana 12. Zakona o konkurenciji („Službeni glasnik BiH“ br. 48/05, 76/07 i 80/09) (u daljem tekstu: Zakon) i obaveze podnošenja prijave koncentracije u smislu člana 14. Zakona.

Podnosilac zahtjeva u istom navodi slijedeće:

- da namjerava osnovati jednočlano društvo sa ograničenom odgovornošću pod nazivom: „ZNSM-BLK“ d.o.o. Brod (u daljem tekstu: ZNSM-BLK), sa sjedištem u Brodu, Republika Srpska, Bosna i Hercegovina.
- da bi osnivački kapital privrednog društva u osnivanju bio 2.000,00 KM;
- da bi privredni subjekt ZNSM Moskva bio 100,0% vlasnik privrednog subjekta ZNSM-BLK;
- da bi pretežna registrovana djelatnost privrednog subjekta ZNSM-BLK bila izgradnja objekata niskogradnje uključujući organizaciju izgradnje, izvođenje građevinskih i građevinskih instalacionih radova, ostale specijalizovane građevinske, arhitektonske i inženjerske djelatnosti i sa njima povezano tehničko savjetovanje;
- da bi privredni subjekt ZNSM-BLK obavljao pretežno građevinske poslove kao glavni izvođač za remont i rekonstrukciju objekata u sastavu privrednog subjekta „Rafinerija nafte“ a.d. Brod, te gradio benzinske stanice na teritoriji Bosne i Hercegovine i uvezio materijale i opremu;
- da je privredni subjekt ZNSM Moskva upisan u Jedinstveni državni registar pravnih lica u Moskvi, dana 26.7.2002. godine pod brojem: 1027700069825, sa osnovnim kapitalom u iznosu od 32.600.000,00 RUB, odnosno 1.534.090,00 KM;
- da privredni subjekt ZNSM Moskva nema povezanih društava na svjetskom ili na tržištu Bosne i Hercegovine, koja obavljaju djelatnost za koju bi se registrovao privredni subjekt ZNSM-BLK;

- da je većinski vlasnik privrednog subjekta ZNSM Moskva Otvoreno dioničko društvo „Zarubežnjeft“ sa 80,0% udjela, dok privredni subjekt Otvoreno dioničko društvo „Njeftegazovaja Innovacionnaja Korporacija“ (u daljem tekstu: NjeftegazInKor) posjeduje preostalih 20,0% udjela;
- da ukupan godišnji prihod privrednog subjekta ZNSM Moskva ostvaren u 2010. godini na svjetskom tržištu iznosi (..)*¹ RUB, odnosno (..) KM, te da u istom nije iskazan podatak o ukupnom godišnjem prihodu na tržištu Bosne i Hercegovine;
- da ukupan godišnji prihod privrednog subjekta ZNSM Moskva ostvaren u 2010. godini na tržištu Bosne i Hercegovine, kroz poslovanje sa privrednim subjektima „Rafinerija nafte“ a.d. Brod i „NESTRO PETROL“ a.d. Banja Luka iznosi (..)* RUB, odnosno (..)* KM;

Koncentracijom, u smislu člana 12. stav (1) tačke a), b) i c) Zakona, smatra se spajanje ili pripajanje nezavisnih privrednih subjekta ili dijelova privrednih subjekta, sticanje kontrole ili dominantnog uticaja jednog, odnosno više privrednih subjekta nad drugim, odnosno nad više drugih privrednih subjekta ili dijelom drugog privrednog subjekta, odnosno dijelovima drugih privrednih subjekta (sticanje kupovinom većine dionica ili udjela osnovnog kapitala, sticanjem većine prava glasa ili na drugi način, u skladu sa odredbama zakona koji regulišu osnivanje privrednih subjekta i njihovo upravljanje) i zajedničkim ulaganjem na dugoročnoj osnovi, dva ili više nezavisnih privrednih subjekta koji djeluju kao nezavisan privredni subjekt.

Obaveza prijave koncentracije privrednih subjekta, u smislu odredbe člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom nivou iznose 100 miliona KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8 miliona KM, ili ako je zajednički tržišni udio učesnika koncentracije na relevantnom tržištu veći od 40%.

Na osnovu dostavljenih podataka, Konkurencijsko vijeće smatra da se u navedenom slučaju privrednog društva u osnivanju ne radi o koncentraciji u smislu člana 12. stav (1) tačka b) pod 3) Zakona i da u skladu s tim Podnosilac zahtjeva ne ispunjava kumulativne uslove iz člana 14. stav (1) tačka a) i b) Zakona, te da ne postoji obaveza prijave koncentracije.

Ovo mišljenje je dato isključivo na osnovu podataka iz Zahtjeva, te ukoliko ovi podaci odstupaju od navedenih ovo mišljenje se ne može primijeniti.

Predsjednik

Ibrica Lakišić

¹ (..)* - Podaci predstavljaju poslovnu tajnu